

Rau To Paulus Imbooda Ila To Yes Epesus

Efesus

1 ¹You Paulus. Maaron ighur ghou nanim mbaŋooŋa to Yesu Kriŋi itaghon tau lolo. Nambood rau tonene ilat to yam tamtoghon patabuaŋa to Maaron to aneep izi ndug Epesus, ve aghur ila to Yesu Kriŋi, ve aneep tuŋia ila toni.^a

²Poia to Tamaan Maaron ve Tiina to it Yesu Kriŋi iza tiam, ve tiŋgin gham aneep pooi toman lolomim luuma. Onoon.

Kriŋi inim ataam pa poia to Maaron iza to it

³Iit tapait Maaron, ye Tiina to it Yesu Kriŋi Tama. Pasa, iit to taneep tuŋia ila to Kriŋi, Maaron igham poian ghiit, ve igham mbeb popoiadi naol to ndug sambam pait, leso ipalot anunuud.

⁴Aghita. Iit to taneep tuŋia ila to Kriŋi, muuŋ kat, sawa to Maaron ighur sambam ve taan sone, ye isia ghiit ighaze igham ghiit tanim le. Leso leed soror eta ila ye mata sob, ve tanim tamtoghon toni patabuaŋa.^b

⁵Tovenen muuŋ kat, Maaron lolo ineeep to it, ve mata iŋgal ighaze igham ghiit tanim ye ndinatu ila uraat to Yesu Kriŋi. Nene ye itaghon tau lolo ve poia toni.^c

⁶Maaron ighaze tamtoghon tipaiti pa poia toni. Tauto igham poian ghiit sorok itaghon tau lolo ve ŋgar toni, ve ighur poia toni tiina kat iza to iit to taneep tuŋia ila to Natu Yesu Kriŋi. Natu tonowen, Tama Maaron lolo pani kat.^d

⁷Poia to Maaron, nene tiina le tiina kat. Iit tamtoghon to taneep tuŋia ila to Kriŋi, siŋ toni ipas ghiit tavot pa samia tapiri, ve ireu soror to it isob ilale.^e

⁸Tovenen Maaron ighur poia toni tiina kat iza to it. Ve ye ipaghazoŋan ghiit pa ŋgar popoia naol, leso taghazoŋan padi. ⁹⁻¹⁰Iŋgar yonŋaŋ toni

a 1:1 Mbaŋ 18:19+; Mbaŋ 19:1+, 20:17+ **b** 1:4 Ro 8:28+; 2Tes 2:13; 2Tim 1:9
c 1:5 Yo 1:12; Ga 4:5 **d** 1:6 Mt 3:17 **e** 1:7 Ro 3:24; Kol 1:14; Hib 9:12; 1Pe 1:18+

to ineep ila tau lolo, tauto Maaron ipaghazoŋan ghiit pani wa. Ŋgar tonowen iŋarua Yesu Krisi. Pasa, Maaron ighaze igham pooz pa mbetisob ila ila le ighaze sawa kat to ye tau ighuri ne ivot, ghoru ilup mbetisob to tineep izi sambam ve taan tinim ee moghon, ve ighur di tineep ila Krisi samba ve Krisi inim daba padi.^f

¹¹Sawa isob, Maaron igham mbetisob tivotvot titaghon tau lolo ve ŋgar toni. Iit tamtoghon to taneep tunja ila to Krisi, muuŋ kat, Maaron isia ghiit itaghon tau lolo ighaze igham ghiit tanim le. Tauto aazne, tagham mbetisob popoiadi naol ila toni.^g

¹²Ve ye ighaze yei Yuda to nighur ila to Krisi muuŋ, nipatoonj tamtoghon pa tapiri ve poia toni, lesu tipait iza.

¹³Ve yam paam. Sawa to aloonj saveeŋ onoon to varu poia ve aghur ila, yamŋa Krisi alup gham anim ee moghon. Pasa, saveeŋ tonowen ipaghazoŋan gham pa ataam to Maaron igham mulin gham ila uraat to Krisi. Ve Krisi ndamo payam, tauto Maaron igham Avuvu Patabuanj payam itaghon saveeŋ mbuaanj toni. Avuvu tonowen, tauto inim ghilaloonj payam ighaze yam tamtoghon toni.^h

¹⁴Maaron Avuvu to taghami ne, nene inim pughu pa mbetisob popoiadi naol to muri ye pale igham di pait. Lesu taghur ila taghaze izaad pa ghamuuŋ mbetisob tonowen, ve tasaan sawa to ye igham mulin ghiit, ve igham ghiit tala taneep tomani izi ndug sambam. Tovenen iit tapait Maaron iza pa tapiri ve poia toni.ⁱ

Suŋuunj to Paulus

¹⁵You naloonj varumim tighaze yam aghur ila kat to Tiina toit Yesu, ve lolomim pa Maaron tamtoghon toni patabuanja tisob, ve aghamgham poian di.^j

¹⁶⁻¹⁷Sawa tonenen ve inim, you napul suŋuunj payam maau. Sawa isob, matag iŋgalŋgal gham ila suŋuunj tiou. Tiina toit Yesu Krisi Tama Maaron, ye iza tiina pa tapiri ve poia toni. You lolog poia pani, ve napaiti pa uraat to ye ighamghami ila lolomim. Ve nanoknok ghasoniinji naghaze tau Avuvu igham gham aghilalal ŋgar popoia, ve ipaghazoŋan gham pa Maaron ŋgar toni, lesu awatag katin Maaron.^k

¹⁸Ve naghaze Maaron igham ghazoonja toni isul ila lolomim, lesu aghilalal mbetisob popoiadi naol naol to ye ighaze igham di pa tamtoghon toni. Nene mbetisob to aazne aghur matamim pani. Ye ipoi gham anim le, lesu agham mbetisob tonowen. Onoon kat, iit Maaron tamtoghon toni izaad pa ghamuuŋ mbetisob katindi to popoiadi kat. Tauto naghaze yam awatag katin di.^l

f 1:9-10 Ro 16:25+; Ep 3:9+; Kol 1:16,26 g 1:11 Ro 8:28+; 2Tim 1:9 h 1:13 Yo 14:16+; Ga 3:14; Ep 4:30; Syg 7:3 i 1:14 Ro 8:23; 2Kor 1:22 j 1:15 1Tes 1:2+ k 1:16-17 Kol 1:9; 2Pe 1:3 l 1:18 Mbanj 26:18; 2Kor 4:6

¹⁹Ve naghason Maaron naghaze igham gham aghilaal katin tapiri to iuluul iit tamtoḡhon to taghur ila toni. Tapiri tonowen, tiina le tiina kat. Ighaze tagham nḡar pani, nene taraua maau.^m

Aazne, Kriḡi ineeḡ izi sambam ve iḡḡin mbeb tisob

²⁰Maaron tapiri to aazne iuluul ghiit, nene raraate inimale tapiri to ipamundigin Kriḡi pa mateeḡ, ve ighami iza ila sambam, ve mbole izi ila Tama Maaron nima waan.ⁿ

²¹Tovenen aazne, Kriḡi ineeḡ to sala we, ve ighamgham pooz pa mbeb tisob. Yes pooza ve daba to tiḡḡinḡḡin ndug, toman mbeb arianeadi to sambam ve taan to ledi tapiridi tintina, mbeb naol naol to ledi izadi, nene Kriḡi iza ve tapiri ilib padi kat, ve tisob tineep ila ye samba. To aazne, ve sawa muri paam.^o

²²⁻²³Pasa, Maaron ighur mbeb tisob tineep ila Kriḡi samba wa. Tauto ye inim daba padi ve ighamgham pooz padi. Ve pooz toni, nene pa iuul yes to tineep ila lupuuḡ toni. Lupuuḡ tonenen, nene inimale Kriḡi tau anoḡa. Ve ye ineeḡ ila lolodi ve ipavonin di pa tapiri ve poia toni le tivon kat, inimale ineeḡ ila mbeb tisob lolodi, ve igham pooz padi.^p

Maaron igham nepooḡ paghu pait

2 ¹Muuḡ, yam aneeḡ animale yes mateeḡa. Pasa, lemim nḡar eta pa Maaron maau, ve irau agham nḡar poia eta maau. Sawa isob, yam amalaḡ pa tutuuḡ toni, ve agham nḡar samsamia naol.^q

²Sawa tonenen, laghoḡḡ tiam, yam ataghon nḡar to taan, ve aloḡḡlooḡ Sadan aliḡa. Ye daba to avuvu samsamiadi to tinepneeḡ izi sambam paroḡania, ve ipapazaagh tamtoḡhon leso tizoor Maaron aliḡa.^r

³Ve yam moghon maau. Yei paam. Pasa, muuḡ iit tasob rarateed. Sawa isob, lolood muḡḡina ipapazaagh ghiit ve tagham nḡar samsamia naol. Pasa, iit tamtoḡhon to taan gabuaad tovene. Tipoop ghiit toman nḡar samia. Tauto muuḡ, mbalmbali to Maaron ineeḡ to itanimale tamtoḡhon tisob to taan.^s

⁴⁻⁵Sawa tonenen, iit taneep tanimale yes mateeḡa. Leed nḡar pa Maaron maau, ve irau tagham nḡar poia eta maau. Sawa isob, tamamalaḡ pa Maaron tutuuḡ toni. Eemoghon Maaron, ye poia pughu, ve lolo isamin ghiit kat. Ve lolo ineeḡ to it kat ve ighaze igham poian ghiit. Tauto igham mulin ghiit itaghon tau lolo ve poia toni, ve ipamundigin ghiit toman Kriḡi ve tagham nepooḡ paghu ila toni.^t

m 1:19 Ep 3:16; Kol 1:29 **n 1:20** 2Kor 13:4; Kol 3:1; Hib 1:3+ **o 1:21** Mt 28:18; Kol 1:16+; Pil 2:9+ **p 1:22-23** Ro 12:5; 1Kor 12:27; Kol 2:10 **q 2:1** Kol 2:13
r 2:2 Yo 8:44; Ep 6:12; Kol 3:6+ **s 2:3** Mbo 51:5; Ro 1:18+; Tit 3:3 **t 2:4-5** Yo 3:16; Kol 2:12+; Tit 3:4+

⁶Ve aazne, nene inimale ye igham iit tamtoghon to taneep tuŋia ila to Kriŋi, ve itiŋa Kriŋi tazala ndug sambam ve taneep tomani ila ina to ghamuŋ pooz.^u

⁷Ila uraat to Yesu Kriŋi, Maaron igham poian ghiit kat. Poia to ye ipatoŋa pait, nene tiina le tiina kat. Pale taghuri iza to sa? Maau. Mbeb eta iraua maau. Ye igham tovene, leso ipatoŋ poia toni ivot ighazoŋ to aazne, ve sawa muri paam. ⁸Tovenen yam to aghur ila to Kriŋi, Maaron igham mulin gham itaghton tau lolo ve poia toni. Mbeb tonenen ivot itaghton ŋgar poia eta to yam aghami ne maau. Maaron igham payam sorok.^v

⁹Tovenen ye igham poian gham itaghton ŋgar poia eta to yam aghami ne maau. Ye igham payam sorok. Leso tamtoghon eta ipait tau sob. ¹⁰Iit tamtoghon to taneep tuŋia ila to Kriŋi, tanimale mbeb to paghunadi kat. Maaron tau ighur ghiit, ve igham ghiit tanim paghu, leso tagham uraat popoia to ye tau ighur di pait pataghaaŋ wa.^w

Kriŋi ilup yes Yuda ve yes to Yuda maau ne tinim ee moghon

¹¹Yam to Yuda maau ne, matamim iŋgal. Muuŋ, yes Yuda tipapait taudi tighaze yes, ghoru tizir di. Ve tiveveleg gham tighaze yam tizir gham maau. Eemoghon uraat to ziroŋ tamtoghon, nene mbeb to uliid moghon to tamtoghon tigham pa nimadi. Nene igham mbeb eta pa lolood maau. ¹²Sawa tonenen, yam aneep sagan pa Kriŋi, ve irau yamŋa Maaron tamtoghon toni to Israel alup gham maau. Muuŋ, Maaron yesŋa yes Israela timbua saveeŋ pa tilup di tinim ee moghon, ve ye imbua saveeŋ popoia naol padi. Eemoghon yam lemim izamim pa saveeŋ mbuaaŋ tonowen maau. Pasa, yam siŋ ite. Ve nepoŋamim izi taan, yam aghilaal mbeb popoia to Maaron ighaze igham di pait ne maau. Pasa, sawa tonenen, yam awatagi maau.^x

¹³Eemoghon aazne, yam anim Kriŋi le ve aneep tuŋia ila toni. Tovenen yam tamtoghon to muuŋ aneep sagan pa Maaron, Kriŋi siŋ toni inim ataam payam ve anim agharau Maaron wa.^y

¹⁴Tovenen Kriŋi tau to inim pughu pa luuma to Maaron inim pait, ve igham ghiit itiŋa Maaron talup ghiit tanim ee moghon. Aghita. Muuŋ, koi ineep ila Yuda ve yes to Yuda maau ne sosodi inim didiŋ padi ve ipoon di, le irau tilup di maau.^z

u 2:6 Kol 3:1+ **v 2:8** Ro 3:24-28; Ga 2:16 **w 2:10** 2Kor 5:17; Ep 4:24; Tit 2:14

x 2:12 Ro 9:4 **y 2:13** Ro 5:2; Kol 1:20; Hib 12:23 **z 2:14** Tutuuŋ naol to Mose isaav tovene: Yes Israela irau tineep sagan pa yes to Yuda maau (Ughita Igham 23:24,32-33, 34:12-16). Ve muuŋ, didiŋ tiina eez iluvut Rumai Tiina. Didiŋ tonowen, timbood paesiŋ katindi ineep ila. Isaav tovene: "Ighaze tamtoghon eta to Yuda maau, imalaan pa didiŋ tonene ve ilooŋ ila, ye pale imaat."

Eemoghon sawa to Krisi imbaad yabyabuun ve imaat, ye ireu didiin tonowen izi, ve ilup di tinim ee moghon.^a

¹⁵⁻¹⁶Muun, tutuun ve saveen ngalsekiin naol to Mose isavia di, nene igham Yuda ve yes to Yuda maau ne tiwaghurun koi pa taudi, ve tineep sagan sagan. Eemoghon sawa to Krisi igham yabyabuun ila tini ve imaat izala ai pambaroon, ye ipasob tutuun toman ngalsekiin naol tonowen, Tauto igham ngar luuma ivot, ve ilup yes to tineep tunja ila toni tinim lupuun ee moghon. Pasa, sawa to imaat izala ai pambaroon, ye irab motin koi to inee ila itija Maaron sosood, ve ilup ghiit toman Maaron tanim ee moghon. Tauto ipasob koi to muun inee ila Yuda ve yes to Yuda maau ne sosodi paam, ve ilup di tinim lupuun ee moghon.^b

¹⁷Ve ye inim ivotia saveen luuma pait ighaze: “Aneep toman lolomim luuma. Pasa, koi inee ila yamja Maaron sosomim muul maau.” Saveen tonene ilat pa yam tamtoghon to muun anee sagan pa Maaron, ve ijarua yei Yuda to nineep nigharui ne paam.^c

¹⁸Pasa, Krisi to inim ataam pa Avuvu ee moghon ilup ghiit tasob, ve Avuvu tonowen iuluul ghiit pa tala tagharau Tamaan Maaron, leso itija tasavsav. Yam to Yuda maau ne, ve yei Yuda paam.^d

¹⁹Tovenen aazne, yam anim loomba, ma sumbudi muul maau. Yam anim tamtoghon to Maaron, ve yamja tamtoghon toni patabuanja asob to sambam.^e

²⁰Yam animale rumai to Maaron malimoona pida. Rumai tonowen, Maaron ireii iyon izala yes mbanooja to Krisi ve yes propeta uraat todi. Ve Yesu Krisi, ye yaam to inim pughu pa rumai ve ipaloti. ²¹Ye ikis rumai toni malimoona tisob tineep tunja ila inadi, ve ighamgham uraat pa reiñ rumai toni, leso iza inim tiina, ve inim Ŋgeu Tiina ina patabuan to nepoon.^f

²²Tovenen yam paam, yamja tamtoghon tisob to tineep tunja ila to Krisi ne, Krisi ighamgham uraat payam, ve iluplup gham. Leso anim Maaron Avuvu ina to nepoon.^g

**Paulus le uraat pa ivotia ngar yongaun to
Maaron pa ndug ndug to Yuda maau**

3 ¹Pughu tonene to you Paulus naghaze naghur gham ila sunjuun tiou. You mbesooja to Yesu Krisi, ve naghamgham uraat pa ulaan yam tamtoghon to Yuda maau. Tauto tighur ghou naneep ila ruum to yabyabuun lolo.^h

a 2:14 Ro 5:1; Ga 3:28; Kol 1:20+ **b 2:15-16** Kol 2:14 **c 2:17** Is 57:19; Lu 2:14; Mbañ 10:36 **d 2:18** Ro 5:2; Ep 3:12; Hib 10:19+; 1Pe 3:18 **e 2:19** Pil 3:20; Hib 12:22+
f 2:21 Mt 16:18; 1Kor 3:11; 2Kor 6:16 **g 2:22** 1Pe 2:5 **h 3:1** Ep 4:1; Pil 1:7; Kol 4:3

²Yam avaat alooŋ varug wa. Maaron ighur uraat inim nimag ighaze nauul gham, lesa awatag ataam to ye ipatooŋ poia toni pait ve igham mulin ghiit.ⁱ

³Ataam tonene, muuŋ iyooy. Eemoghon Maaron ivotia payou ve naghazooŋ pani wa. Ūgara pida, to nasavia ila rau tiou wa. ⁴Ighaze awaat rau tonene, nene pale aghilaal aghaze uraat to Kriŋ ŋgara, you naghazooŋ pani. Ūgar tonowen, muuŋ iyooy. Ve aazne, Maaron ivotia ighazooŋ wa. ⁵To muuŋ ve inim, Maaron ivotia ŋgar tonenen pa iit tamtoŋhon maau. Eemoghon aazne, ila uraat to tau Avuvu, ye ivotia ŋgar tonenen pa yes mbaŋooŋa toni patabuaŋa ve yes propeta pida, le ivot ighazooŋ. ⁶Ūgar yooŋaŋ tonenen, nene vene: Yam to Yuda maau, varu poia inim ataam payam, ve anim Kriŋ le ve aneep ila toni. Tauto aazne, yamŋa yes Yuda anim lupuuŋ ee moghon, ve yamŋa izamim pa ghamuuŋ nepooŋ poia ila to Maaron itaŋhon saveeŋ mbuaŋa toni.^j

⁷You, Maaron igham poian ghou itaŋhon tau lolo ve poia toni, ve tapiri igham uraat payou, tauto nanim mbesooŋa toni, ve leg uraat pa navotia varu poia tonene pa tamtoŋhon.^k

⁸Onoon, you poiaŋ maau. Ūgar samia to muuŋ naghamaŋhami, nene igham ghou naneep muri kat pa Maaron tamtoŋhon toni tisob. Eemoghon Maaron igham poian ghou kat itaŋhon tau lolo ve poia toni, ve ighur uraat inim nimag ighaze navotia Kriŋ varu pa ndug ndug to Yuda maau ne. Lesa tiwatag Kriŋ tapiri toman ŋgar popoia naol to tineep toni, ve mbep popoiadi to ye ighaze igham di pait. Mbep tonowen, ighaze tagham ŋgar padi, nene pale ŋgar toit iraua maau.^l

⁹Maaron ighur mbep tisob tivot. Muuŋ ve inim, ye ivotia ŋgar toni ighazooŋ maau. Ineep to tau moghon. Eemoghon aazne, ye ivotia ighazooŋ wa. Ve ighaze you napaghazoŋan tamtoŋhon pani, lesa tisob tiwatag ataam to ye igham ŋgar toni yooŋaŋ tonenen anoŋa ivot.^m

¹⁰Maaron igham tovene, lesa yes aŋela toman mbep arianoŋa pida to tineep izi sambam ve tighamaŋham pooz ne, matadi inim pa iit tamtoŋhon to taneep ila lupuuŋ to Kriŋ ne, ve tighilaal ŋgar popoia naol naol to tineep to Maaron.ⁿ

¹¹Mbeb naol tonene titaghon Maaron tau ŋgar toni to ineep muuŋ kat ve inim, sawa to sambam ve taan tivot sone. Ve aazne, Tiina toit Yesu Kriŋ igham anoŋa ivot wa. ¹²Tovenen iit to taghur ila to Kriŋ ve taneep tunja ila toni, irau tala tagharau Maaron ve tasavsavv tomani. Tamatughez malep. Pasa, iit tawatag: Mbep eta ipoon ghiit pani muul maau.^o

¹³Tovenen onoon, uraat to you naghamaŋham payam, tauto inim pughu payou ve aazne nambaad patanoŋa. Eemoghon naghaze napalot gham tovene:

i 3:2 Mbaŋ 9:15; Ga 2:7 j 3:6 Ga 3:14,28+; Ep 2:14+ k 3:7 Ro 1:5; Kol 1:23+
l 3:8 1Kor 15:9+; 1Tim 1:13+ m 3:9 Ro 16:25+ n 3:10 1Pe 1:12 o 3:12 Yo 14:6;
Ro 5:2; Ep 2:18; Hib 10:19

Patajanani to nambaada ne, igham gham lolomim ipatajan ve itatan gham malep. Ayoon ariaja, ve tinimim iza. Pasa, uraat tiou tonene pale inim ataam payam pa aneep toman Maaron ila nguruba lolo.^p

Sujuuŋ to Paulus

¹⁴Tovenen Tamaan Maaron igham ngar popoia naol pait. Tauto naput agheg pani ve naghaze naghur gham ila sujuuŋ tiou. ¹⁵Maaron, ye inim pughu pa mbep tisob to sambam ve taan. Ve ye inim tamandi, ve yes tisob tigham izadi ila toni. ¹⁶Ye iza tiina kat pasa, ye iraua kat pa tapiri, ngar, ve mbep popoia to naol ne. You naghasoni naghaze igham Avuvu Patabuanj ineeep tunja ila lolomim, ve ipariaanj gham pa tau tapiri, lesu ayoon ariaja.^q

¹⁷Ve naghaze ye igham gham aghur ila to Krisi kat, ve Krisi ineeep tunja ila lolomim. Ve akis ngar to lolood pa Maaron ve tamtoghon ariaja inimale ai waria ikor taan, ve ayoon ila ngar tonenen.^r

¹⁸Maaron igham gham yamja ival tiina anim tamtoghon toni patabuanja wa. You naghaze yam asob aghilaal aghaze Krisi lolo ineeep toit kat. Iŋgar toni tonowen, tiina le tiina kat. Pale taghuri iza to sa? Pasa, ila le ila mala kat, ve izala le izala sala kat, ve izila le izila kat.^s

¹⁹You naghaze le Maaron igham gham awatag katin ngar to Krisi to ye lolo pait kat. Eemoghon pale araua maau. Pasa, ngar toni tonenen ilib pa iit tamtoghon ngar toit. Ighaze Maaron igham mbep naol tonenen ivot payam, nene pale ipavonin gham pa tapiri ve ngar toni popoia to naol ne le tivon kat ila lolomim.^t

²⁰Maaron tapiri to aazne ighamgham uraat ila lolood, nene tiina le tiina kat. Tovenen sa mbep to ighaze taghason pani, ma mataad ingali, nene ye irau igham pait. Ve tonene moghon maau. Mbep katindi to iit tagham ngar padi maau ne paam, ye irau igham di. Pasa, mbep eta irau ila muri maau. ²¹Tovenen iit to taneep tunja ila to Krisi ve taneep ila lupuuŋ toni ne, iit irau tapait Maaron iza pa tapiri ve poia toni irau sawa isob. To aazne, ve itaghoni taghoni gha ila. Onoon.

Mbeb pida to ilup Krisi tamtoghon toni tinim ee moghon

4 ¹You naneep ila ruum to yabyabuuj lolo pasa, nanim Tiina toit Yesu le, ve naghamgham uraat toni. You naghaze napalot gham tovene: Maaron igham poian gham, ve ipoi gham anim le wa. Tovenen laghoonj tiam, yam irau ataghon ngar poia to denja pa poiŋ toni tonenen. Ataghon ngar tovene:^u

p 3:13 Pil 1:12+; Kol 1:24 **q 3:16** 1Kor 16:13; Ep 6:10; Kol 1:11 **r 3:17** Yo 14:23; Kol 1:23, 2:7 **s 3:18** Mbo 103:11; Kol 2:2+ **t 3:19** Kol 2:10 **u 4:1** Ep 3:1; Pil 1:27; 1Tes 2:12

²Apait taumim izamim malep. Sawa isob, yam atatan izamim izila kat, ve ataghon n̄gar luuma. Ve ighaze tamtoghon tigham samin gham, yam ayati malep. Ambaada moghon, ve aghur lolomim padi ve agham poian di.^v

³Iit tamtoghon to Kriſi, Maaron Avuvu ilup ghiit tanim ee moghon wa. Tovenen yam irau azuaria gham pa n̄gar luuma. Pasa, n̄gar tonenen to ikis lupuuŋ to Kriſi, leso tavalag ghiit sob, ve taneep pooi.^w

⁴⁻⁶Aghita. Lupuuŋ ee moghon to Kriſi to inepneep. Nene iit tamtoghon toni to tanim Kriſi anoŋa. Ve Maaron Avuvu ee moghon to inepneep. Ve sawa to Maaron ipoi gham anim le, ye ipoi gham pa aghur matamim pa mbep ee moghon.^x

Ve Tiina toit ee moghon, ghurla toit ee moghon, ghamuuŋ ya toit ee moghon, ve Tamaan ee moghon. Nene Maaron. Mbep tisob tineep ila ye samba ve tigham uraat titaghon n̄gar toni. Ve ye inep ila mbep tisob lolodi.^y

Maaron irei uraat naol naol irau iit enjaeŋa

⁷Kriſi igham poian ghiit, ve irei tapiri tiina ve n̄gar popoia naol irau iit enjaeŋa.^z

⁸Saveeŋa inep pataghaaŋ wa. Ighaze:

“Ye iparab le ilib pa koia. Ve sawa to izala sala, ighereb ival tiina to ye iyou di tinim le, ve yesŋa tila, ve irei mbep popoia pa tamtoghon.”^a

⁹Saveeŋ to ighaze ye izala sala, nene pughu tovene: Ye izala moghon maau. Papazogi ye izi inim taan, ve imaat gha izila kat mateeŋa ndug todi. Ve imundig muul, tauto izala. ¹⁰Tovenen n̄geu to izi inim taan, tauto imuul iza ila pa sambam to inep sala le sala kat. Leso inep irau ndug to naol ne, ve iŋgin mbep tisob.^b

¹¹Kriſi ighur uraat naol naol tinim nimaad, leso tapalot lupuuŋ toni. Tamtoghon pida tinim mbaŋooŋa toni, pida tinim propet, ve pida tivovotia varu poia pa yes to tighur ila maau. Ve pida ledi uraat pa n̄giniŋ lupuuŋ to Kriſi, ve tipatoot tamtoghon pa Maaron aliŋa.^c

¹²Kriſi ighur uraat tovene inim nimaad, leso tapalot Maaron tamtoghon toni, ve anadi timbees pooi pa Maaron ve tamtoghon paam, ve tiuul lupuuŋ to Kriſi le ivot kat itaghon n̄gar toni. ¹³Iit irau taghamgham tovene, le ghurla toit iyaryaŋ ve tawatag katin Maaron Natu. Leso

v 4:2 Ga 5:22+; Kol 3:12+; 1Tes 5:14 w 4:3 Kol 3:14+ x 4:4-6 Iit Kristen taghurghur mataad pa sawa to itiŋa Kriſi talup ghiit izi ndug sambam, ve taneep ila yesuru Tama Maaron n̄gurubadi. y 4:4-6 Ro 11:36, 12:5; 1Kor 8:6, 12:13; Kol 1:5 z 4:7 Ro 12:6; 1Kor 12:4+ a 4:8 Mbo 68:18; Kol 2:15 b 4:10 Mbaŋ 1:9; Ep 1:20+; Hib 4:14 c 4:11 Ro 12:6+; 1Kor 12:27+

lupuun toit ee moghon, ve ngar toit imatu, ve tataghon suvun ngar to Yesu Krisi.^d

¹⁴Tovenen iit tataghon ngar to ndipain muul malep. Pasa, ndipain tikis Maaron aliņa tunjia maau. Yes tinimale waan to yaghur ve dibom iwatokini ila inim. Ighaze ndiran to tiraua kat pa ghamuun kaarom, tinim ve tingal di pa saveen, nene pale rikia moghon tighur ila saveen kaarom todi, ve tipul ataam to Maaron.^e

¹⁵⁻¹⁶Eemoghon iit tagham tovene malep. Iit irau lolood pa tamtothon ve tagham poian di, ve tasavia saveen onoon moghon padi. Ve tazuarua ghiit le tataghon katin ngar isob to Krisi, ve taneep tunjia ila toni. Pasa, ye to inim daba pait, ve iit to taneep ila lupuun toni ne, tanimale ye anoņa pida pida. Ye ilup ghiit tanim ee moghon, ve ikis ghiit tunjia, leso tagham uraat toit toit. Ve uraata toni, to tinim sengana, ve tilup anoņa pida pida tonowen ve tikis di tinim ee moghon, ve tipapalot di. Ighaze lolood pa tauud, ve iit enaenja tagham katin uraat toit toit, nene pale lupuun to Krisi ivot inim tiina, ve iyaryaaj.^f

Tataghon ngar paghu to Krisi

¹⁷⁻¹⁸Tovenen you nasaav ariņa payam ila Maaron iza: Yes to tiwatag Maaron maau, yam ataghon ngar todi muul malep. Pasa, ngar todi le anoņa poia eta maau. Ngarg todi iyaryaaj tighaze tizoor Maaron aliņa ve titaghon ngar to ndoroom. Tauto ighamun ngar todi, le tineep saguan pa nepoon poia to iit taghami ila to Maaron.^g

¹⁹Matadi samia tinimale ngavuun. Ve mayadi rita maau. Tila pa naghodi moghon. Sa ngar to ulidi to matadi ingali, nene tighami moghon. Tauto tighamgham ngar samsamia naol to tingalaan ila Maaron mata maau.^h

²⁰Laak, sawa to yam aghur ila to Krisi, ve tipatoot gham pa ataam toni, tisaav payam pa ataghon ngar tovene? Maau kat! ²¹You nawatag: Yam aloon Yesu varu, ve tipatoot gham pa saveen onoon to ineep toni, le aghazoon pani. ²²Yes tisaav payam tovene: Nepoon tiam to muun, lolomim ipazaagh gham pa ngar kaarom ve ngar samsamia naol. Eemoghon aazne, yam irau aghur murimim pa ngar mungina tonanan inimale nonogiņa to aghita isami ve apiyaava ilale. Ataghami muul malep. Pasa, ngar tovene pale iwaghamun gham.ⁱ

²³Ve tisaav payam tighaze yam irau apul Maaron itoor ngar tiam toman lolomim inim paghu.^j

d 4:13 2Kor 3:18; Kol 1:28, 2:2 **e** 4:14 1Kor 14:20; Yems 1:6 **f** 4:15-16 Ep 1:22; Kol 1:18, 2:19 **g** 4:17-18 Ro 1:21; Ep 2:12; 1Pe 4:3 **h** 4:19 Ro 1:24; Kol 3:5; 1Tes 4:5 **i** 4:22 Kol 3:7+; Hib 12:1; 1Pe 2:1 **j** 4:23 Yo 3:3; Ro 12:2

²⁴Maaron ighaze igham ngar tiam inim paghu kat, lesu ataghon saveenj onoon, ve ngar tiam denja ve patabuanj inimale ye tau. Tovenen yam irau agham ngar paghu ila toni, inimale andud gham pa nonogiija paghu.^k

²⁵Tovenen, yam asob apul ngar to ghamuuj kaarom ineepale, ve asavia saveenj onoon moghon pa taumim. Pasa, iit tanimale Krisi anoja pida pida, ve ye ilup ghiit tanim ee moghon wa.^l

²⁶Ighaze atemim yabyab, ghoru apatum gham. Pa vene, agham sosor. Tovenen agharaat lolomim le isob, ghoru ndag izila.^m

²⁷Aghur soso pa Ijgeu Samia malep.ⁿ

²⁸Ve yes yubyubja tiyub iraua. Yes irau timundig ve tigham uraat popoia pida pa taudi nimadi. Lesu tigham ledi mbep ve tiuul yes mbolaaja.^o

²⁹Ve saveenj samia eta ivot ila avomim malep. Asavia saveenj popoia moghon to irau iuul tamtothon, ve ipatoot di pa sa ngar to yes tikankaan pani. Lesu saveenj tiam inim ataam pa poia to Maaron iza todi.^p

³⁰Ve agham Avuvu Patabuanj to Maaron lolo ipatanjan malep. Pasa, ye to inim ghilalooj payam ighaze yam anim Maaron le wa. Ighaze ye ineep ila lolomim, yam awatag: Sawa to Krisi imuul inim, ye pale igham mulin gham, ve aneep pooli.^q

³¹Tovenen ngar to nujuuaaj, ateed yabyab, kisiinj malmaliinj toit, kokaaj, bobaaj soroksorok, ngaliinj saveenj, ve piyavooj saveenj velegiinj, toman ngar samsamia pida paam, ineep tiam malep. Apul di tisob tineepledi.

³²Ve agham poian taumim, lolomim isamin nditamim, ve awagharaton lolomim ve apul sosor to nditamim, inimale Maaron ireu sosor tiam ila uraat to Yesu Krisi.^r

5 ¹⁻²Maaron lolo payam kat, ve igham gham anim ye tau ndinatu. Tovenen laghoonj tiam, yam irau ataghon ngar toni, ve lolomim pa tamtothon tisob ve agham poian di, inimale Krisi lolo pait ve ipul tau imaat pait. Ijgar to ye ighami, nene igham Maaron lolo poia inimale watoonjrau to vuzi poia kat.^s

Taneep sagan pa ngar samsamia

³Ijgar to ghuruunj maat, ngar to mataad samia inimale ngavuun, ve ngar to mataad mbep, yam aneep sagan pani. Ijgar tovene ivot ila lolomim malep, ve asavia rita malep. Pasa, yam anim Maaron tamtothon toni patabuanja wa. Ighaze agham ngar tovene, nene denja maau.^t

k 4:24 Ro 6:4; 2Kor 5:17; Kol 3:10 l 4:25 Sek 8:16; Kol 3:8+ m 4:26 Mbo 37:8; Mt 5:22+; Yems 1:19+ n 4:27 Ep 6:11; Yems 4:7; 1Pe 5:9 o 4:28 Igham 20:15; 1Tes 4:11+; 2Tes 3:8+ p 4:29 Ep 5:4; Kol 3:8, 4:6 q 4:30 2Kor 1:22; Ep 1:13+; 1Tes 5:19 r 4:32 Mt 6:14; Kol 3:13 s 5:1-2 Mt 5:48; Yo 13:34; 1Pe 1:15+; 1Yo 3:16 t 5:3 1Kor 6:18+; Ga 5:19; Kol 3:5; 1Tes 4:3

⁴Ve saveeņ samia eta ivot ila avomim malep. Tovenen asavia kombol malep, ayou avomim pa saveeņ soroksorok malep, ve asavia saveeņ samia inimale mogheraanj malep. Pasa, ŋgar tovene, nene deņja maau. Yam irau lolomim poia pa Maaron ve apaiti pa poia toni.^u

⁵Ve alooņ. Ighaze tamtoghon eta ighurghur maat, ma mata samia inimale ŋgavuun, ma mata mbeb, nene ye ineep ilooņ ila pooz to Krisi maau, ve iza pa ghamuun nepooņ poia izi Maaron ndug toni maau. Pasa, ŋgar tovene, nene inimale tambees pa maaron kaarom.^v

⁶Tovenen matamim imosmoos pooi pa taumim. Pa vene, tamtoghon titombaan gham pa saveeņ todi soroksorok, ve tiweu gham ve agham ŋgar samsamia to nasavia di ne. Ve yam awatag: Yes to tizoroor Maaron, ve tinoknok ghamuun ŋgar tovene, nene pale mbalmbali to Maaron iza todi.^w

⁷Tovenen yam ala toman di pa ŋgar todi tonowen malep. Aneep sagan padi.

Tataghon ŋgar to ghazooņa

⁸Muun, yam ataghon ŋgar to ndoroom. Eemoghon aazne, yam aneep tunja ila to tiina toit Yesu, ve ghazooņa toni isul gham. Tovenen laghoonj tiam, yam irau ataghon ŋgar to ghazooņa. ⁹Ghazooņa to Krisi, anoņa tovene: ŋgar popoia to naol ne, toman ŋgar deņja, ve saveeņ onoon.^x

¹⁰Ve atoova pa aghilaal ŋgar to igham Maaron lolo poia.^y

¹¹⁻¹²Ŋgar to ndoroom, nene le anoņa poia eta maau. Tovenen yam aneep sagan pani. Ŋgar tovene, yam avotia ivot ighazooņ, leso tamtoghon tighilaala ve tipuli. Pasa, ŋgar to tighamghami inim ŋgozaan, nene samia kat. Ighaze tasavia, nene pale mayaad.^z

¹³Eemoghon ghazooņa to Krisi igham mbeb tisob tivot tighazooņ.^a

¹⁴Ve ghazooņa toni isul di ve itoor di. Leso anadi tipatooņ ghazooņa toni. Pughu tonene to tisavsaav tighaze:

“Yom to ugheen, umundig pa mateeņ. Leso ghazooņa to Krisi isul ghom.”^b

Ŋgar to yes to titaghon pooz to Avuvu Patabuan

¹⁵Tovenen matamim pa laghoonj tiam pooi. Yes to tikankan pa Maaron ŋgar toni, yam ataghon di malep. Yam irau aneep animale yes to tiwatag Maaron ŋgar toni.

¹⁶Ighaze yam irau agham ŋgar poia eta, ghoru aghami pataghaan. Pasa aazne, taneep ila sawa samia. Tovenen takankan pa muri. Pale irau aghami, ma maau?

u 5:4 Ep 4:29 **v** 5:5 1Kor 6:9+; Syg 21:8 **w** 5:6 Ro 1:18; Kol 3:6 **x** 5:9 Ro 13:12;
 1Yo 1:7+, 2:9+ **y** 5:10 Ro 12:2 **z** 5:11-12 Mt 18:15; 1Kor 5:9+; 2Kor 6:14
a 5:13 Yo 3:20+ **b** 5:14 Ro 13:11

¹⁷Tovenen agham nggar to borouŋa malep. Azuaria gham le aghazoonŋ pa nggar to Maaron lolo pani.^c

¹⁸Ve aghun ya ariaŋa le asami malep. Pa vene, agham nggar to iwaghamun taumim. Yam irau apul Avuvu Patabuaŋ ipavonin gham pa nggar toni ve tapiri, ve igham pooz payam.^d

¹⁹Sawa to alup gham, asavia mbouŋ to yes Israela, ve ambou mbouŋ to sunjuuŋ, toman mbouŋ pida to Maaron Avuvu igham di payam ne paam. Leso apait Maaron iza, ve apariaaŋ taumim paam. Yam irau ambou toman lolomim ve apait Tiina toit Yesu.^e

²⁰Ve sa mbep to ighaze ivot payam, poia payam ma ipataŋan payam, nene lolomim poia pa Tamaan Maaron, ve apaiti ila Tiina toit Yesu Krisi iza irau sawa isob.^f

²¹Yam aroron pa Tiina toit Yesu Krisi, ve aghaze ataghon nggar toni. Tovenen atatan taumim ve aneep ila nditamim sambadi.^g

Saveeŋ ijarua yes vaivaiaŋa

²²Tovenen yam ndiliva, aneep ila ndizwamim sambadi ve ataghon nggar todi, inimale aneep ila Krisi samba ve ataghon nggar toni.^h

²³Pasa ndizwamim nditamoot, yes tinim daba payam, ve tigham pooz payam, inimale Krisi inim daba pa lupuuŋ toni, ve ighamgham pooz padi. Lupuuŋ toni, nene inimale ye tau anoŋa. Ve ye ipul tau imaat padi, tauto igham mulin di, ve tineep pooi.ⁱ

²⁴Tovenen yam ndiliva aneep ila ndizwamim sambadi ve ataghon nggar todi pa mbep tisob, raraate inimale lupuuŋ to Krisi tineep ila ye samba ve titaghon nggar toni.

²⁵⁻²⁶Ve yam nditamoot, lolomim pa ndizwamim kat ve agham poian di, inimale Krisi lolo pa iit tamtoghon to taneep ila lupuuŋ toni, ve ipul tau imaat pait, ve irughuuz ghiit pa ya toman saveeŋ toni. Leso taŋgalaŋ ila Maaron mata ve tanim tamtoghon toni patabuaŋa.^j

²⁷Pasa, Krisi ighaze lupuuŋ toni ivot kat [inimale liva to ighaze ivai ve igharaat tau le paghuna kat.] Leso sawa to Mboŋ Muri, ye igham iit tamtoghon to taneep ila lupuuŋ toni ne, ve itiŋa talup ghiit tanim ee moghon, ve iit popoiaad ila ye mata. Leed sosor eta maau, ve nggar samia eta ineep toit muul maau, ve tataghon nggar patabuaŋ moghon.^k

²⁸Tovenen yam nditamoot irau ataghon Krisi nggar toni tonowen paam, ve lolomim pa ndizwamim ve agham poian di, inimale lolomim pa taumim anoŋamim. Ŋgeu to ighaze lolo pa azuwa ve igham poiani, nene

c 5:17 Ro 12:2 **d** 5:18 Lu 21:34; Ro 13:13 **e** 5:19 Kol 3:16 **f** 5:20 Kol 3:17; 1Tes 5:18; Hib 13:15 **g** 5:21 1Pe 5:5 **h** 5:22 Mbnp 3:16; Kol 3:18; 1Pe 3:1+ **i** 5:23 1Kor 11:3; Ep 1:22+; Kol 1:18 **j** 5:25-26 Yo 15:3; Kol 3:19; 1Pe 3:7 **k** 5:27 2Kor 11:2; Kol 1:22; Tit 3:5; Hib 10:22

lolo pa tau ve iuul tau paam. ²⁹Aghita. Tamtoghon eta ighur koi pa tau anoŋa maau. Iit tasob mataad pa anoŋaad ve tangini pooi. Kriŋi itaghon ŋgar raraate moghon pa iit tamtoghon to taneep ila lupuuŋ toni. ³⁰Pasa, iit tanimale ye tau anoŋa pida pida.^l

³¹Saveeŋ to Maaron ineep pataghaaŋ tovene:

“Pughu tonene to tamoot eta ighaze ivai, ye irau ipul tama ve tina, ve yesuru azuwa tilup di tinim ee moghon.”^m

³²Saveeŋ tonene, ŋgara tiina, ve pughu yonŋaaŋ ineep ila. Nene nasavia vaiuuŋ ŋgara pida to iŋarua Kriŋi ve lupuuŋ toni.ⁿ

³³Eemoghon saveeŋ tonene iŋarua ghiit paam. Tovenen yam nditamoot asob lolomim pa ndizwamim ve agham poian di, inimale lolomim pa taumim. Ve yam ndiliva atandag pa ndizwamim, ve apakur di.

Saveeŋ iŋarua yes ndipain toman nditamandi ve nditinandi

6 ¹Yo, yam ndipain anim Tiina toit le wa. Tovenen alooŋ nditamamim ve nditinamim aliŋadi. Pasa, ŋgar tonene deŋia ila ye mata.^o

²⁻³Alooŋ Maaron aliŋa tonene:

“Matam loŋloŋaiŋa pa tamam ve tinam, ve utandag padi.”^p

Tutuŋ tonene, nene tutuuŋ inim mata to saveeŋ mbuaaŋ ineep ila. Saveeŋ tovene:

“Leso uneep pooi ve uneep mala izi taan.”

⁴Ve yam nditamandi, awaghamun ndinatumim lolodi malep. Pa vene, agham di atedi yabyab sorok. Yam irau aŋŋin di pooi, ve apasalunŋan di toman saveeŋ luuma. Leso ataghon ataam to Tiina toit.^q

Saveeŋ iŋarua yes mbesooŋa sorok ve daba todi

⁵Yam mbesooŋa, alooŋ daba tiam aliŋadi ve atandag padi, ve ambees padi pooi toman lolomim, raraate inimale ambesmbees pa Kriŋi.^r

⁶Agham kaarom pa uraat malep. Mbesooŋa pida, ighaze daba todi tineep ve tighita di pa uraat todi, nene pale tigham katin uraat, lesa tigham di lolodi poia. Ve sawa to daba todi tipul di ve tila, ghoru tigham poian uraat maau. Yam agham tovene malep. Pasa, yam mbesooŋa to Kriŋi. Tovenen yam irau agham uraat tiam toman lolomim. Lesa ataghon Maaron ŋgar toni. ⁷Tovenen tinimim imbees pa uraat tiam ve aghami toman lolomim poia. Pasa, yam agham uraat pa tamtoghon moghon maau. Yam agham uraat tonanan pa Tiina toit Yesu paam. ⁸Ve yam awatag: Sa uraat poia to ighaze iit taghami, nene pale Maaron igham atia

l 5:30 Ro 12:5; 1Kor 12:27 m 5:31 Mbnp 2:24; Mt 19:5 n 5:32 Syg 19:7

o 6:1 Kol 3:20+ p 6:2-3 Igham 20:12; Mt 15:4 q 6:4 Lo 6:7; Np 22:6 r 6:5 Kol 3:22; 1Tim 6:1; Tit 2:9+; 1Pe 2:18

poia pait itaghon uraat to iit erjaeŋa. Ye pale igham tovene pa tamtoĝhon tisob. Yes mbesooŋa, ve yes to mbesooŋa maau ve tiŋgin taudi ne paam.^s

⁹Ve yam daba paam, apatoonŋ ŋgar to Krisi pa mbesooŋa tiam. Apamatughezan di sorok malep. Pasa, yam awatag: Yamŋa mbesooŋa tiam lemim daba ee moghon. Ye Tiina tiam to ineep izi sambam. Ve ye igham ŋgar pa tamtoĝhon izadi maau, ve ivool to tamtoĝhon eta maau. Ye itaghon ŋgar ee moghon pa tamtoĝhon tisob.^t

Mbeb to malmal to Maaron igham pait

¹⁰You naghaze nasavia saveeŋ tiou tonene, ve isob. Yam irau agham tapirimim ila to Tiina toit. Pasa, ye ariana, ve tapiri tiina kat.^u

¹¹Ve yam irau agharaat gham pa mburuguuŋ tisob to malmal to Maaron igham di pait. Leso sawa to ighaze Ŋgeu Samia itoov gham, ma itombaana gham, yam pale ayoon tuŋia.^v

¹²Pasa, yam awatag. Itiŋa tamtoĝhon to taan taparab maau. Aazne, mbeb samsamia naol to tapiridi ve izadi tintina, tinim koiaadŋa ve taparab toman di. Mbeb tonowen tineep ila inadi to sala we, ve tighamgham pooz toman tapiridi, lesa tipalot ŋgar to ndoroom izi taan.^w

¹³Tovenen yam irau agharaat gham, ve aghur mbeb tisob to malmal to Maaron igham di pait. Leso sawa to ighaze tovaan samia ivot payam, yam pale ayoon tuŋia, ve aparab ariana ve alib pa tovaan tonenen. Ataam to ayoon tuŋia, nene vene:^x

¹⁴Yam irau akis saveeŋ onoon, ve ataghoŋi toman lolomim. Pasa, nene inim puus pa apus nonogiiŋa tiam.^y
Ve yam irau ataghoŋ ŋgar deŋia. Pasa, nene inimale mbeb ariana to ipoon atemim pa ndaab.^z

¹⁵Ve varu poia to isavia ataam to itiŋa Maaron ve tamtoĝhon talup ghiit tanim ee moghon, yam irau agharaat gham pa votiaaŋi irau sawa isob. Pasa, ŋgar tovene pale ipalot gham inimale andud duduunŋa to aghemim ve alaagh.^a

¹⁶Tovenen yam ataghoŋ ŋgar naol tonenen, ve akis ghurla tiam ariana. Pasa, ghurla tiam, nene inimale sigeu to ipoon gham pa pane ndinatu tisob to Ŋgeu Samia to yab ighanghan ila matadi. ¹⁷Ve uraat to Yesu Krisi to igham mulin ghiit, nene aghami inim lemim. Pasa, nene inimale hat ariana to ipoon dabamim pa ndaab. Ve saveeŋ to Maaron to Avuvu Patabuanŋ igham pait, nene yam akisi inim lemim buza.^b

s 6:8 Mt 25:34+; 2Kor 5:10 t 6:9 Ro 2:11; Kol 4:1 u 6:10 1Kor 16:13; 2Tim 2:1
v 6:11 Ro 13:12+; 2Kor 10:4 w 6:12 Ep 2:2; 1Pe 5:8+ x 6:13 2Kor 6:7, 10:4
y 6:14 Sawa to yes ndaab to Rom tila pa malmal, tiput nonogiiŋa todi iza, ve tipusi
pa puus. Leso tilaan kat. z 6:14 1Tes 5:8 a 6:15 Is 52:7; Ro 10:15 b 6:17 1Tes 5:8;
Hib 4:12; Syg 19:15

¹⁸Ve asuŋ itaghon pooz to Avuvu Patabuanŋ irau sawa isob. Aghason Maaron pa iuul gham pa mbep to naol ne. Ve tinimim imum pa suŋuunŋ malep. Apamaat ariana, ve aghur Maaron tamtoghon toni patabuanŋa tisob tila suŋuunŋ tiam.^c

¹⁹Ve matamim iŋgal ghou ila suŋuunŋ tiam paam. Aghason Maaron pa ipalot ghou ve igham pooz pa saveeŋ tiou. Leso sawa to navotia mos toni pa tamtoghon, namatughez sob, ve napaghazoŋan di kat pa varu poia to muunŋ iyooŋ ve aazne ivot ighazoŋ.^d

²⁰You naghama Tiina toit avo, ve navovotia saveeŋ toni pa tamtoghon. Tauto tighur ghou naneep ila ruum to yabyabuunŋ lolo, ve tikau ghou pa sen. Tovenen yam lolomim imaagh payou malep. Aghur ghou ila suŋuunŋ tiam. Leso namatughez sob, ve nayoon ariana, ve navotia katin varu poia itaghon Maaron ŋgar toni.^e

Paulus ipasob saveeŋ toni

²¹⁻²²Toŋvetaz toit Tikikus, ye mbesooŋa poia eez to Tiina toit Yesu Kriŋi, ve lolog pani kat. You nambaana ilat, lesa ipaes payam pooi pa nepooŋa tiei ve uraat tiei, ve ipalot gham pa saveeŋ pida paam.^f

²³Yam toŋvetaz, Tamaan Maaron yesuru Tiina toit Yesu Kriŋi pale tiŋgin gham asob aneep pooi, ve luuma todi iza tiam. Ve tipalot gham, lesa lolomim pa tamtoghon ve agham poian di, ve aghur ila ariana.

²⁴Tamtoghon tisob to lolodi ikis Tiina toit Yesu Kriŋi ariana, poia toni iza todi itaghoni taghoni gha ila. Onoon.

c 6:18 Lu 18:1; Kol 4:2; 1Tes 5:17 **d 6:19** Ro 15:30+; Kol 4:3; 2Tes 3:1
e 6:20 Mbanŋ 28:20; 2Kor 5:20 **f 6:21-22** Mbanŋ 20:4; Kol 4:7+